

佛說五王經

失譯人名今附東晉錄

昔者有五王國界相近共相往來不相攻伐
唯作善友其最大者字普安王習菩薩行餘
四小王常習邪行大王憐愍意欲度之呼來
上殿共相娛樂乃至七日終日竟夜作倡妓
樂七日已滿四小王共白大王言國事甚多
請還政治大王語諸左右嚴駕車乘群臣吏
民都共送之至其半道大王憐愍意欲度之
語諸小王曰各說所樂悅樂之情一王答言
我願欲得陽春三月樹木榮華遊戲原野是
我之樂一王復言我所樂異願我常作國王
鞍馬服飾樓閣殿堂官屬人民圍遶左右見
晃煜煜槌鐘鳴鼓出入行來路人傾目是我
之樂一王復言我所樂異願復得好婦好兒

端正無雙共相娛樂極情快意是我之樂一
王復言我所樂復異願我父母常在多有兄
弟妻子羅列好衣美食以恣其口素琴青衣
共相娛樂是我之樂各自說其所樂竟四王
俱迴頭白其大王所樂何事大王答言我先
說卿等所樂然後說我之樂卿一人言陽春
三月樹木榮華遊戲原野秋則彫落非是久
樂卿一人復言願我常作國王鞍馬服飾樓
閣殿堂官屬人民圍遶左右晃煜煜槌鐘
鳴鼓出入行來路人傾目往古諸王隱隱賑
賑快樂無極福德轉盡諸國相伐忽然崩亡
非是久樂卿一人復言願得好婦好兒端正
無雙共相娛樂極情快意一朝疾病憂苦無
量此非久樂卿一人復言願我父母常在多
有兄弟妻子羅列好衣美食以恣其口素琴

青衣共相娛樂一朝有事爲官所執繫閉在
獄無有救護此非久樂四人俱問王樂云何
王言我樂不生不死不苦不樂不饑不渴不
寒不熱存亡自在此是我樂四王俱言此樂
何處當有明師大王答言吾師號曰爲佛近
在祇洹精舍諸王歡喜各詣佛所稽首作禮
退坐一面大王胡跪合掌白佛言我等今得
爲人闇鈍無知但深著世樂不知罪福願佛
爲弟子等說其苦諦佛言卿等善聽當爲汝
說人生在世常有無量衆苦切身今粗爲汝
等略說八苦何謂八苦生苦老苦病苦死苦
恩愛別苦所求不得苦怨憎會苦憂悲惱苦
是爲八苦也何謂生苦人死之時不知精神
趣向何道未知生處並受中陰之形至三七
日中父母和合便來受胎一七日如薄酪二

七日如稠酪三七日如凝酥四七日如肉醬
五胞成就巧風入腹吹其身體六情開張在
母腹中生藏之下熟藏之上母嗽一杯熱食
灌其身體如入鑊湯母飲一杯冷水亦如寒
冰切體母飽之時迫逼身體痛不可言母饑
之時腹中了了亦如倒懸受苦無量至其滿
月欲生之時頭下向產門如兩石夾山欲生
之時母危父怖生墮草上身體細軟草觸其
身如履刀劒忽然失聲大喚此是苦不諸人
咸言實是大苦何謂老苦父母養育至年長
大自用强健擔輕負重不自裁量寒時極寒
熱時極熱饑時極饑飽時極飽無有節度漸
至年老頭白齒落目視眊眊耳聽不聰盛去
衰至皮緩面皺百節痛疼行步苦極坐起呻
吟憂悲心惱識神轉滅便旋即忘命日促盡

言之流涕坐起須人此是苦不大王答曰實是大苦何謂病苦人有四大和合而成其身何謂四大地大水火大風大一大不調百一病生四大不調四百四病同時共作地大不調舉身皆痛水大不調舉身胗腫火大不調舉身蒸熱風大不調舉身強硬百節苦痛猶被杖楚四大進退手足不任氣力虛竭坐起須人口燥唇焦筋斷鼻拆目不見色耳不聞音不淨流出身卧其上心懷苦惱言輒悲哀六親在側晝夜看侍初無休息甘饐美食入口皆苦此是苦不大王答曰實是大苦何謂死苦人死之時四百四病同時俱作四大欲散鬼神不安欲死之時刀風解形無處不痛白汗流出兩手摸空室家内外在其左右憂悲涕哭痛徹骨髓不能自勝死者去之風去

氣絕火滅身冷風先火次鬼靈去矣身體挺直無所復知旬日之間肉壞血流胗脹爛臭甚不可近棄之曠野衆鳥噉食肉盡骨乾髑髏異處此是苦不答言實是大苦何謂恩愛別苦室家内外兄弟妻子共相戀慕一朝破亡爲人抄劫各自分張父東子西母南女北非唯一處爲人奴婢各自悲呼心內斷絕窈窕冥冥無有相見之期此是苦不答言實是大苦何謂所求不得苦家有財物散盡追求大官吏民望得富貴勤苦求之求之不止會遇得之而作邊境令長未經幾時貪取民物爲人告言一朝有事檻車載去欲殺之時憂苦無量不知死活何日此是苦不答曰實是大苦何謂怨憎會苦世人薄俗共居愛欲之中爭不急之事更相殺害遂成大怨各自相

避隱藏無處各磨刀錯箭挾弓持杖恐忽相
見會遇狹道相逢張弓注箭兩刀相向不知
勝負是誰當爾之時怖畏無量此是苦不答
曰實是大苦何謂憂悲惱苦人生在世長命
者乃至百歲短命者胞胎傷墮長命之者與
斯百歲夜消其半餘有五十年在醉酒疾病
不知作人已減五年小時愚癡十五年過未
知禮儀年中八十老耄無知耳聾目冥無有
法則復減二十年已九十年過餘十歲之中
多有諸愁憂天下欲亂時亦愁天下旱時亦
愁天下大水亦愁天下大霜亦愁天下大熱
亦愁室家內外多諸病痛亦愁持家財物治
生恐失亦愁官家百調未輸亦愁家人遭縣
官事閉繫在獄未知出期亦愁兄弟妻子遠
行未歸亦愁居家窮寒無有衣食亦愁比舍

村落有事亦愁社稷不辦亦愁室家死亡無
有財物殯葬亦愁至春時種作無有犁牛亦
愁如是種種憂愁常無樂時至其節日共相
集聚應當歡喜方共悲涕相向此是苦不答
曰實是大苦爾時五王及諸群臣會中數千
萬人聞佛說諸苦諦心開意悟即得須陀洹
道皆大歡喜作禮而去四王俱白普安王言
大王真是大權菩薩化導我等令得道跡大
王之恩我本觀諸宮殿心情愛著不能遠離
今觀宮殿如視穢廁無可樂者即捨王位付
弟出家爲道修諸功德日日無倦

佛說五王經